



QUARTA SESSIONE STRASURDINARIA DI U 2019
4EME SESSION EXTRAORDINAIRE DE 2019

19 È 20 DI DICEMBRE DI U 2019
19 ET 20 DECEMBRE 2019

2019/E4/118

**Dumanda à bocca Sposta da Paula Mosca
à nome di u gruppu « Femu a Corsica »**

UGGETTU : Prucessu di scrizione di a lingua corsa à u Diploma di Cumpetenze in Lingue

O sgiò Presidente di u Cunsigliu Esecutivu,
O sgiò cunsiglieru incaricatu di a lingua corsa,

U mese scorsu, ind'una lettera scritta u 12 di nuvembre di u 2019, a prifetta di Corsica Josiane Chevalier, affermava chì u ricrutamentu di i persunali corsofoni in un stabilimentu bislingu dedicatu à a prima zitellina, pudia esse cunsideratu cum'è discriminatoriu. Dumandava tandu di mudificà l'annessu 4 di a deliberazione chì prupunia l'impieggu di persunali corsofoni pè a ciucciaghja bislingua di Laetizia, pruprietà di a Cullettività, in Aiacciu.

In a vostra risposta, avete ammentatu di prima chì e persone scelte , u serebbenu di pettu à e so cumpetenze à u livellu di a prima zitellina. È dinù, ch'ellu vi tucava quì à piglià in cunsiderazione una cumpetenza linguistica. Per compie, avete rispostu chì a deliberazione ùn serebbe micca ritirata.

Ste situazione è ste problematiche voltanu à spessu. Intantu, hè detta in a lettera chì u statu in e dichjarazione di u so ripresentante più altu hà pigliatu una pusizione à prò di a messa in ballu d'una pulitica bislingua. St'affermazione ùn tocca micca solu a lingua corsa ma tutte e lingue regiunale.

Esistenu e furmazione è e certificazione in lingua corsa. Sò pensate segundu u mudellu di e certificazione auropee, è sò ricunnosciute da l'Accademia di Corsica. A Cullettività di Corsica finanzeghja quelle di l'Università di Corsica pè i studenti è quelle di u Greta pè i salariati.

Finanzeghja dinù l'associi chì si sò impegnati in lu dispositivu novu di e case di a lingua, chì appuntu permettenu à u publicu di seguità una preparazione à Ste certificazione.

Eppuru quelle certificazione ùn permettenu una ricunniscenza vera per ciò chì tocca propiu e competenze prufeziunale. Una scrizzione à u Diploma di Cumpetenze in Lingua permetterebbe forse d'offre è d'assigurà di modu definitivu una legittimità ghjuridica à sta cumpetenza.

Sgiò Presidente di u Cunsigliu esecutivu, sgiò Cunsiglieru incaricatu di a lingua, ci pudete dà u vostru parè nant'à st'ultimu puntu è facci sapè sè, segondu à voi, ùn serebbe micca interessante chì a Culletività di Corsica si dessi di manu pè dumandà di modu ufficiale a scrizzione di a lingua corsa à u Diploma di Cumpetenze in Lingue, per via di l'arrestatu di u 13 dicembre di u 2010 chì hà permessu a scrizzione di u Bretonnu è l'Occitanu ?

O allora, quale pò spiegà oghje chì ciò chì ghjè lecitu per duie lingue dette regionale da parechji anni ùn serebbe micca per a nostra ?

Soca, Ùn serebbe tandu, un fattu accertatu di discriminazione, pè parlà cum'è a signora prifetta ?